

# CARTA JEE NI TEE SAN PABLO

## APOSTOL NUU TITO

---

**1** Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó, <sup>2</sup>te cocuhun ni i jeē cótecu i níí cáni. Chi nde ná tu jecōo ñayīví te ni jejnūhun Yaā Dios jeē cótecu yō, te íyó ndāā jnūhun ni cahān yā. <sup>3</sup>Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. <sup>4</sup>Te tée ri carta yáha cuájee nuū rō Tito, chi nájñuhun sēhe ri cúu ndije ró síquī jeē ínuú-ni cándíje yó yá. Te ñúhun ni ri jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo síi ni rō.

### Jniñu ya jeē ni sáha Tito nde isla Creta

<sup>5</sup>Te ni stóo ri rohó ndé isla Creta, návāha sándaā rō síquī jniñu jeē cúmani gā cundaā, te cani ró táca tée jéhu condito ñayuu cáncandíje tǎcá ñuu, nájñuhun ni ndacu ri jniñu nuū rō. <sup>6</sup>Te tēe jéhu un

cánuú jeē ma cóo ni iin jeē nihín ñayuu cuēchi síquī de. Te cánuú coo iin-ni ñasihí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha vāha i chí jéē níhni ni i nuū de. <sup>7</sup>Chi tēe cácujeñhu cáncandíje jniñu nuū ñáyuu cáncandíje, cánuú caca ndaā de chi cáncandíje jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tēe nájini, ma cuajnáhan de, te ma ndíyo ni de xūhún. <sup>8</sup>Chi sa cánuú jéē niní cuāha núu de vehe nuū ñáyuu cájica, te níni sáha de jniñu váha, te ndito coo xini de, te coo de tēe ndaā, te coo ndoo ánuá de, te casi de modo jeē cuní maá de. <sup>9</sup>Te cánuú cuiñi nihin de jíin jnūhun ndaā jeē ni scuáha de, návāha cuu stǎhví ni de ñayuu jíin táca jnūhun ndaā vāha, te suni cuu sáha de jeē jécūhun ni ñayuu cácuu contra, te casi i yuhu i.

<sup>10</sup>Chi íyó cuéhē ñayuu nihni ni, te cástéén i inga modo jéni ni maá i jeē súcuán cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuán. <sup>11</sup>Te cánuú jéē casi rō yuhu táca tée ún, chi cástéén de jnūhun jeē tu íyó

váha stéén de, chi cúní de nihin de xūhun síquī ún. Te súcuan sáca nuu de xiní ndíhi ñayuu tǎcǎ vehe.

<sup>12</sup>Te iin tēe isla Creta jeē nácani jnūhun, ni cahān de síquī jnāhan ñuu de: Jnāhan yó ñayuu Creta, chi máni ñayuu stahú cácuu i, te nájnūhun quití xéén casáha i, te máni ndíhví ni i caji cuehē i, te cúxí i, áchí de. <sup>13</sup>Te ndaā cúu jnūhun ni cahān tēe ún. Jeē yúcuan na cúxeēn rō nuū i, návāha ndaā vāha na cándíje i. <sup>14</sup>Te ma sáha i cuenta tǎca jnúhun ni catava jnāhan yó hebreo, jeē maá cuento-ni cúu, ni ma squícu i jniñu cándacu tēe ni quendacoo nuū jnúhun ndaā.

<sup>15</sup>Te ñayuu jeē ní ndundoo jeē níjnūní, máni modo iyó ndoo íyó váha jéni ni i jító i tǎcǎ-ni. Te ñayuu tu cándíje jeē tu ní ndúndoo jeē níjnūní, máni jéni ni i iin modo tú ndoo tú vāha síquī tǎca jéé jító i. Chi nde jeē níjnūní i jíin ánuá i íyó jnéhén. <sup>16</sup>Te vésú cácahān i jeē jíní i Yaā Dios, te jíin jniñu casáha i te jíní yō jeē tú ndije i. Chi ñayuu ndevāha ñayuu nihni ni cácuu i, te tu cúu sáha i ni iin jniñu váha.

### Jnūhun ya jeē steén ndaā vāha

**2** Te máá ró chi níní na cáhán rō tǎca jnúhun jeē quijnāhan jíin jnúhun ya jeē steén ndaā vāha. <sup>2</sup>Te cahān rō jíin tǎca tēe jéhnu jeē na cóo cájí ni de, te sáha yíñúhún de, te ndito coo xiní de, te candíje nihin de jnūhun cúndáhú ni yā de, te cundáhú ni de jnāhan de, te cuandeyí ni de. <sup>3</sup>Te suni súcuan tǎcǎ ñahan jéhnu, na sáha yíñúhún ña, te ma sajnúhún ña, te ma nájini ña. Te na stéén ña tǎca jéé váha.

<sup>4</sup>Te na stéén ña nuū tǎcǎ ñahan súchí jéé coo maní ña jíin yíi ña jíin séhe ña. <sup>5</sup>Te ndito coo xiní ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yíi ña, návāha ma cahán neé ñayuu síquī jnúhun Yaā Dios.

<sup>6</sup>Te suni súcuan stíhví ni rō tǎca tēe suchí jeē ndito na cóo xiní de. <sup>7</sup>Te róhó, cuu ró iin ejemplo nuū de jeē sáha ró tǎca jniñu váha. Te jeē steén rō nuū de te ndaā steén rō te coo ndije ni rō. <sup>8</sup>Te ndaā vāha stéén rō, návāha ma cúu cahān ñayuu síquī. Te súcuan te cucanu ñayuu cácuu contra, chi ma cúu cahān i ni iin cuēchi síquī rō.

<sup>9</sup>Te cahān rō jíin ñayuu cácuu mozo jeē na cuatáhú i nuū patrón i, te na sáha i tǎcǎ jniñu jeē újnahan ni de, te ma cahán maá i núu ndácu de jniñu nuū i. <sup>10</sup>Te ma sacuíhná i ndajniñu de, chi na cúu i ñayuu ndaā ndije, návāha jíin tǎca jniñu jeē sáha i, te cuni tǎca ñayuu jeē yóhoyo luu cúu jnūhun jeē steén síquī Yaā Dios, Yaā jnáma yóhó.

<sup>11</sup>Chi vijna je ni steén Yaā Dios ndese sáha ya jeē váha ñayuu, chi cúní yā jnama ya ndíhi ñayuu ñayíví. <sup>12</sup>Te jnūhun jeē váha ni yā jíin yó, suu stéén nuū yō jeē na síáá yō jniñu neé jíin tǎca jéé ndíyo neé ni yō. Te ndito na cóo xiní yō ini ñayívi yáha, te caca ndaā yō, te chiñúhún váha yó Yaā Dios. <sup>13</sup>Te suni stéén nuū yō jeē cocuhun ni yō jeē quéndōo ndetū yō jeē quiji máá quíví jéhnu jeē quénda ndijin Yaā Dios, Yaā cujéhnu ndasí, suu Jesucristo, Yaā jnáma yóhó. <sup>14</sup>Chi ni socó yā maá yá jehē yō, návāha jnama ya yohó núu

táca jniñu néé, te sándoo ndihí ya anuá yō jeē cuu yō ñáyuu maá yá, te condihvī ni yō sáha yō jniñu váha.

<sup>15</sup>Táca jnúhun yáha cánuú steén rō, te stíhvī ni rō i, te cahān rō nuū i, chi súcuan ndíso jniñu ró. Te ma cuáha ro jnúhun jeē sajéē ni ni ñin i nuū rō.

### Ndese cánuú sáha ñayuu cácanđije

**3** Te na nástíhvī ni rō i jeē cuatáhu váha i nuū tēe cácujeñhu jíin tēe cándiso jniñu ñuu. Te na squícu i jniñu cándacu de, te coo ñamā ni i sáha i táca jniñu váha. <sup>2</sup>Te ma cahán neé i siquī ni ñin ñayuu, te coyūcu mánī i jíin ñayuu, te coo vāha ni i, te coo vitá ni i jíin ndihí ñayuu.

<sup>3</sup>Chi máá yō suni ni cuu yō ñáyuu canéé jeē tu jécūhun ni nde saá, te ni cacunihni ni yō nuū Yaā Dios. Te ni cacandije yō táca jnúhun tú ndaā, te ni cajejniñu sáa-ni yō núū táca jéē ní ndiyo néé ni yō jíin na-ni jniñu ni cusī ni yō. Te ni cajica yō jíin jniñu néé jíin jnúhun cuésún ni. Chi ni cajito uhū ñayuu yohó, te ni cajito uhū yō i. <sup>4</sup>Yūcuán na te Yaā Dios, Yaā jnáma yohó, ní steén yā jeē váha ni yā te cúndáhu ni yā ndihí ñayuu ñayiví. <sup>5</sup>Te ni jnama ya yohó, te tú na jniñu váha ní cásáha yō jéē jnáma ya yohó, chi sa siquī jeē ní cundáhu ni yā yohó. Chi ni nacate ya anuá yō, te súcuan ni nacacu jeé yō, te ni ndujeé yō ni sáha ya jíin máá Espíritu Santo. <sup>6</sup>Te yōhyo ni cunuú Espíritu Santo ini anuá yō, jeē ni sáha Yaā Dios jeē jíin Jesucristo, Yaā jnáma yohó. <sup>7</sup>Te súcuan te ni ndahva yā cuēchi yō síquī jeē váha ni yā, te nihin tahú yō cotecu yō níí cáni, nájnūhun ñūhun ni yō.

<sup>8</sup>Ndaá cúu jnúhun yáha, te cúni rī jeē niní cáhān nihin ro táca jnúhun

yáha, návāha ñayuu cácanđije Yaā Dios, na cóndihvī ni i cocuu i jíin jniñu váha. Chi íyó váha táca jéē yáha, te níhín jniñu jeē quéndōo váha ánuá ndihí ñayuu. <sup>9</sup>Te ma quívi nduu rō jíin táca jnúhun cánéé íi, jíin jnúhun siquī ndese vēji táca jíi yō, jíin táca jnúhun sáha jeē cátejñáhan i cácahān i jeē cánuú squícu yō ley Moisés. Chi máni jnúhun cáhā-ni jeē tu níhín jniñu cúu.

<sup>10</sup>Te núu íyó ñáyuu jeē sáha jeē ndusñin ini ñayuu cácanđije, te cahān rō nuū i ñin uū jínu, te núu ma chúhun ni i, te quenehen ró i. <sup>11</sup>Chi jíni rō jeē ñin ñayuu sáha súcuan, stívī ndasí i chi jíni i jeē tú vāha sáha i, te jeē yúcuán jécondee cuēchi siquī i.

### Jeē cána Pablo quiji Tito nuū de

<sup>12</sup>Te jeē tají rí Artemas chí Tíquico cuajeé de, yūcuán na te nducú ndéyí ró quiji ró núu rī ñuu Nicópolis, chi je ni cundaā ni rī jeē yúcuán condee rī tiempo mījin. <sup>13</sup>Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuáha ró jéē jíni ñúhún de jeē quíngoo ga de ichi nuū quihín de. Te coto ró jéē ma cúmanī ni ñin nuū de. <sup>14</sup>Te ñayuu cáhiin jíin yō, cánuú cutūhva i sáha i táca jniñu váha, te chindéé ñáhán i ñayuu cúmanī nuū, návāha ma cótecu saá-ni i.

### Saludo jíin bendición jeē sándihí

<sup>15</sup>Táca ñáyuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jíñā jeē maní yō jíin síquī jeē cácanđije yō. Te núhun ni rī jeē na sáha ga Yaā Dios jeē váha róhó jíjñáhan ró. Súcuan na cóo. Amén.